



otpannews.kz

1973 ЖЫЛДЫҢ 13 СӘУІРІНЕН ШЫҒА БАСТАДЫ

МАҢҒЫСТАУ



Kaspi Bank
арқылы жазылу

№87 (10487) 6 ҚАРАША, БЕЙСЕНБІ, 2025 ЖЫЛ

ОБЛЫСТЫҚ ҚОҒАМДЫҚ-САЯСИ ГАЗЕТ



Маңғыстау мен Германия СЕРІКТЕСТІГІ НЫҒАЯ ТҮСТІ

МАҢҒЫСТАУ ОБЛЫСЫНЫҢ ӘКІМІ НҮРДӘУЛЕТ ҚИЛЫБАЙ ГЕРМАНИЯ ФЕДЕРАТИВТІК РЕСПУБЛИКАСЫНЫҢ АЛМАТЫ ҚАЛАСЫНДАҒЫ БАС КОНСУЛЫ МАТТИАС КИСЛЕРМЕН КЕЗДЕСТІ. ЖИЫНДА ТАРАПТАР ЕКІЖАҚТЫ ҰНТЫМАҚТАСТЫҚТЫҢ ӨЗЕКТІ БАҒЫТТАРЫН, ОНЫҢ ІШІНДЕ САУДА-ЭКОНОМИКАЛЫҚ ЖӘНЕ ИНВЕСТИЦИЯЛЫҚ БАЙЛАНЫСТАРДЫ КЕҢЕЙТУ МӘСЕЛЕЛЕРІН ТАЛҚЫЛАДЫ.

Халықаралық қатынастың ынтымақтастық жолын бастауға түрткі болған бас қосуда қос тарап экономикалық және мәдени-гуманитарлық қарым-қатынасты, сан алуан саладағы ынтымақтастықты дамытуға

тың серпін беру қажеттігін сөз етті. Екіжақты кездесуде инвестициялық мүмкіндіктер мен өңіраралық кәсіпкерлікті дамыту перспективалары, сондай-ақ Маңғыстау облысы мен Германия Федеративтік Республикасы арасындағы

экономикалық байланысты одан әрі нығайту мәселелері талқыланды. Атап айтқанда, екі ел арасындағы алыс-беріс көлемін ұлғайтуға, сондай-ақ инвестициялық және инновациялық-өндірістік бағыттарды ілгерілетуге, сан түрлі салада тың технологияларды қолданудағы неміс тәжірибесін енгізу тәсілдері сөз болды.

«Маңғыстау облысы – инвестиция салуға қолайлы аймақ. Біз логистикалық және өндірістік инфрақұрылымды дамытуға, бірлескен жобаларды жүзеге асыруға мүдделіміз. Германия біздің өңір үшін маңызды экономикалық серіктес болып саналады», – деді облыс әкімі.

Өз кезегінде Маттиас Кислер Германияның

Қазақстанмен, соның ішінде Маңғыстау облысымен экономикалық, технологиялық және экологиялық бағыттарда бірлескен жобаларды дамытуға қызығушылық танытып отырғанын жеткізді.


Кездесу өзара тиімді серіктестікті одан әрі тереңдетуге және екі тарап арасындағы ынтымақтастықты жаңа деңгейге көтеруге бағытталған пікір алмасумен аяқталды. Алдағы уақытта тараптар екіжақты ұсыныстарды жан-жақты зерделей келе, әріптестік байланысты бекемдеуге бағытталған жобаларды жүзеге асыруға мүдделі екенін алға тартты.

Айта кетейік, бүгінде Маңғыстау облысында германиялық капиталды тарту нәтижесінде экономиканың әр түрлі салаларында 20-дан астам кәсіпорын тіркелген. 2025 жылдың 8 айының қорытындысы бойынша Маңғыстау облысы мен Германия арасындағы сыртқы сауда айналымы 12,4 млн. АҚШ долларын құрады. Оның ішінде экспорт көлемі – 370 мың АҚШ доллары, импорт – 12,1 млн. АҚШ доллары.

Өз тілшіміз.

ХАЛЫҚАРАЛЫҚ ЖАСТАР ФОРУМЫ – ЖАҢАШЫЛДЫҚ АЛАҢЫ

ЖАСТАР БОЛАШАҚТЫҢ ЖАРҚЫН АЙНАСЫ ІСПЕТТІ. ОЛАР ҚОҒАМНЫҢ ҚОЗҒАУШЫ КҮШІ РЕТІНДЕ ОЗЫҚ ИДЕЯЛАРМЕН ҚАРУЛАНЫП, ӨНІРДІҢ ӨСІП-ӨРКЕНДЕУІНЕ ӨЗІНДІК ҮЛЕСІН ҚОСЫП КЕЛЕДІ. ЖАСТАРДЫҢ ЖАСАМПАЗ БАСТАМАЛАРЫ МЕМЛЕКЕТТІ ЖАҢА ДЕНГЕЙГЕ КӨТЕРУГЕ ЖОЛ АШАДЫ. МАҢҒЫСТАУДА АЛҒАШ РЕТ «АКТАУ YOUTH FORUM» ХАЛЫҚАРАЛЫҚ ЖАСТАР ФОРУМЫ ЖҰМЫСЫН БАСТАДЫ.



Аталған жобаның басты мақсаты – әр саладағы дарынды жастардың басын қосып, олардың арман-мақсаттарына жол ашу. Еліміздің әр түкпірінен, сонымен қатар Өзбекстан, Түрікменстан, Өзбекстан, Қырғызстан және Түркия елдерінен келген жетекші жастар өзара тәжірибе алмасып, экономика, әлеумет, білім, мәдениет, спорт салаларындағы жетістіктерді саралап, ортақ мәселелермен күресудің онтайлы жолын табуға талпынады.

ҚР Мәдениет және ақпарат министрлігі, Маңғыстау облысы әкімдігі мен облыстық жастар саясаты мәселелері

жөніндегі басқармасының мұрындық болуымен өткен іс-шарада әр саланың үздіктері төрт бағытта жастармен диалог құрды. Форумның салтанатты ашылуында Мәдениет және ақпарат министрлігінің Жастар және отбасы істері комитетінің төрағасы Қайрат Қамбаров аталған іс-шараның Маңғыстауда өткізілуіне ерекше тоқталды.

«Маңғыстау – қазақ руханиятының кайнары, рух пен мәдениеттің түйіскен мекені, Ұлы Жібек жолының қақпасы, түркі өркениетінің іргетасы қаланған қасиетті өңір. Жастар мәселесін осы аймақта талқылау терең мәнге ие. Бүгін Актау

төрінде көтерілген жастардың дауысы – елдің ертеңіне арналған үн. Маңызы зор форумға тарихы мен мәдениеті бай, дамуға ұмтылған көрші елдердің өкілдері де қатысып отыр. Шетелдік меймандарымызға жастар мен билік арасындағы көпір саналатын іс-шараға атсалысқаны үшін алғыс білдіреміз», – деді ол.

Маңғыстау облысы әкімі жастар игілігі үшін жасалған іс-шаралар туралы айтты. Маңғыстау жастар саясаты өркендеуінің жарқын үлгісі екенін атап, форумның маңызын айқындады.

(Жалғасы 2-бетте)

БУ-ГАЗ ҚОНДЫРҒЫСЫ САЛЫНАДЫ

МАҢҒЫСТАУ ОБЛЫСЫНЫҢ ӘКІМІ НҮРДӘУЛЕТ ҚИЛЫБАЙ «CHINA HUADIAN CORPORATION» КОМПАНИЯСЫНЫҢ ВИЦЕ-ПРЕЗИДЕНТІ У ЦЗИНКЭЙМЕН КЕЗДЕСТІ. КЕЗДЕСУДЕ ТАРАПТАР ӨНІРДІҢ ЭНЕРГЕТИКАЛЫҚ ӘЛЕУЕТІН АРТТЫРУҒА БАҒЫТТАЛҒАН ЖАҢА ИНВЕСТИЦИЯЛЫҚ ЖОБАНЫ ЖҮЗЕГЕ АСЫРУ МӘСЕЛЕЛЕРІН ТАЛҚЫЛАДЫ.

Қытайлық инвестор Актау қаласы маңында қуаттылығы 160 мегаватт болатын бу-газ қондырғысын (ПГУ) салуды жоспарлап отыр. Жоба «Актаулық энергетикалық компания» ЖШС арқылы іске асырылады. Бірлескен кәсіпорынның құрылтайшылары – «China Huadian Overseas Investment Company Limited» (70%), «Qazaqstan Investment Corporation» АҚ (20%) және «МАЭК» ЖШС (10%).

Жобаның жалпы құны 190 миллион АҚШ долларын құрайды. Нысанды 2027 жылдың екінші тоқсанында пайдалануға беру жоспарланып отыр. Құрылыс кезінде 800-900 адам жұмысқа тартылса, нысан пайдалануға берілген соң тұрақты түрде 80-100 адам еңбек етеді.

Сонымен қатар аталған компания «МАЭК» мекемесінің негізгі қондырғаларын жаңғырту бағытында жұмыстар жүргізуге қызығушылық танытатынын мәлімдеді.

Аймақ басшысы Нұрдәулет Қилыбай жоба Маңғыстау облысының энергия қауіпсіздігін нығайтуға және жаңа жұмыс орындарын ашуға айтарлықтай үлес қосатынын атап өтті.

«Өңір үшін стратегиялық маңызы бар жобаларды қолдауға әрқашан дайынбыз. Энергетикалық инфрақұрылымды дамыту – экономиканың тұрақты дамуы мен халықтың әлауатының кепілі. Сондықтан бұл бастаманы жүзеге асыруға жан-жақты қолдау көрсетеміз», – деді облыс әкімі.

Өз кезегінде «China Huadian Corporation» компаниясының вице-президенті У Цзинкэй жоғаға қатысты жұмыстардың жоспарға сай жүріп жатқанын және қазақстандық серіктестермен өзара тиімді әріптестікті одан әрі нығайтуға ниетті екенін жеткізді.

«Маңғыстау» ақпарат.